

05 JANUARI 2018

Seludup heroin bernilai AS\$3 juta dalam paket teh

Seludup heroin bernilai AS\$3 juta dalam paket teh



SEORANG lelaki dan seorang perempuan ditahan bersama bungkusan dadah seberat 170kg yang cuba diseludup ke Vietnam dari Laos pada Selasa lalu.

HANOI - Polis Vietnam berjaya menumpaskan penyeludupan dadah jenis heroin bernilai AS\$3 juta (RM12.04 juta) yang disembunyikan dalam paket teh dari Laos, lapor media tempatan semalam.

Rampasan tersebut adalah merupakan yang terbesar di negara komunis tersebut.

Vietnam adalah pusat transit utama dalam perdagangan dadah kawasan 'Segitiga Emas', sebuah wilayah di sebahagian Laos, Thailand dan Myanmar.

Kawasan itu juga adalah rantau pengeluar dadah kedua terbesar dunia untuk dadah jenis methamphetamine, candu dan heroin.

Operasi polis di pergunungan wilayah Dien Bien, utara Vietnam pada Selasa lalu berjaya menahan seorang lelaki berusia 44 tahun dan seorang wanita lewat 30-an yang membawa 170 kilogram (kg) heroin pada

bahagian belakang motosikal mereka.

Dadah itu diseludup masuk dari Laos dan dibungkus dalam uncang teh jenama Thai, demikian menurut akhbar polis tempatan, *Cong An Nhan Dan*.

"Operasi itu sangat berjaya, kita merampas sejumlah besar heroin," kata laporan itu memetik Timbalan Ketua Polis Wilayah Dien Bien, Le Cong Binh.

Dadah tersebut dipercayai akan dibawa ke sebuah negara ketika melalui Vietnam, tambahnya tanpa memberikan maklumat lanjut.

Vietnam bersaing dengan China, pasaran dadah terbesar Asia, namun mempunyai garis pantai yang panjang dan menjadi pintu masuk ke Indonesia, Filipina dan Australia.

Vietnam mempunyai undang-undang berat bagi pesalah dadah, dengan membawa lebih 600 gram heroin atau lebih 20kg candu boleh dihukum mati. - AFP